

本畏廬尺牘

康南海尺牘

中華民國十一年六月初版
中華民國十六年三月五版



分售處

各省中華書局	發行所 上海棋盤街	發行所 上海南京路	發行所 上海南京路	編輯者 文 明 書 局	印刷者 文 明 書 局
--------	--------------	--------------	--------------	-------------------------	-------------------------

會澤生尺牘一冊二	角	樊樊山尺牘一冊八	分
俞曲園尺牘一冊二角五分		康南海尺牘一冊七	分
吳擘甫尺牘二冊四	角	林畏廬尺牘一冊	
王益吾尺牘一冊一	角	章太炎尺牘一冊一	角
王壬秋尺牘一冊二	角	梁任公尺牘一冊一角五分	

以上十種合購定價大洋一元三角

康南海尺牘

覆教育部書

亡越異域十有六年。迴瞻故國。邈隔星漢。不預聞政事久矣。比者不遺采及葑菲。辱承大部貽書。命作國歌。以協雅樂。猥以菲才。非能承也。重以雅意。豈敢辭也。雖然。漢之興也。徵魯諸生。以作禮樂。魯兩生曰。禮樂百年而後興。今非其時也。傳謂人給家足。無忿怒之氣。無愁怨之思。無險詖之心。人民美好。含哺鼓腹而遊。然後太平成而頌聲作。夫樂者感物而動。故治國之音雄以樂。亂國之音亂以厲。亡國之音哀以思。吾嘗遊印度緬甸。瓜哇安南。而聞其樂。哀澀嗚咽。斷續不成聲。信乎亡國之樂也。又遊突厥。暹羅波斯。而聞其樂。哀緊亂嘈。信乎亂國之樂也。然聞歐樂。則高明廣大。度幾夏聲。雖強武豪激。非韶奏石聲之和平。然真治強之樂也。乃知先聖謂象功昭德。應政而作。非迂論也。今吾國生民塗炭。國勢搶攘。道揆凌夷。法守掃蕩。廉耻靡盡。教化榛蕪。名為共和。而實共爭共亂。日稱博愛。而益事殘賊虐殺。口唱平等。而貴族之階級暗增。高談自由。而小民之壓困日甚。不過與多數暴民以恣睢放蕩。破法律。棄禮教而已。披閱報紙。舉國甚囂塵上之聲。苟非爭殺亂暴。則奪攘矯虔而已。以此時而製樂。雖使后夔典之。師曠侑之。研極工商。窮精律呂。亦必吳季札聞之而驚走。萬寶常聽之而下淚耳。益令國人哀思鄙厲。豈有當哉。今之亟亟議樂歌者。為應接外使。潤色文明也。實則為步武泰西。俾與齊同耳。以外人有國樂。則吾亦不可無國樂云爾。雖然。泰西有國教。吾何為有國教。而自棄之。孔子曰。禮云

禮云。玉帛云何哉。樂云。樂云。鐘鼓云何哉。又曰。聲色之以化民末也。蓋樂德有其本。不在樂歌之末矣。鄙人遠處絕國。闇無聞知。逖聽風聲。聞自共和以來。百神廢祀。乃至上帝不報本。孔子停丁祭。天壇鞠為茂草。文廟付之榛荆。鐘簴墮頓。絃歌息絕。神祖聖伏。禮壞樂崩。曹社鬼謀。秦廷天醉。嗚呼。中國數千年以來。未聞有茲大變也。頃乃聞部令行飭。各直省州縣。令將孔廟學田充公。以充小學校經費。有斯異政。舉國惶駭。既已廢孔小學童子。未知所教。俟其長成。未知猶得為中國人否也。抑將為洪水猛獸也。嗚呼哀哉。何居我聞此政也。抑或誤效法國之革命。舉教產以充公乎。則彼新舊教爭。所毀者。教皇之舊教耳。其敬奉者。固在路德之新教也。其尊基督如故也。猶吾國昔逐荀子。鄭康成。於文廟外。而尊孟子。程朱云耳。於孔子無損也。乃今公然收文廟之祭田。則是直欲廢黜孔子矣。在諸公久停丁祭。不敬已久。甯在此舉。然貴部主持教化。名為教育。教者。文行忠信。不知以何為教育者。果行育德。不知以何為育也。夫立國之道。廣矣大矣。博深密微。本末精粗。莫不備舉。然後能為之。萬國之聖賢豪傑。講求數千載。然猶難之。故曰。體不備。謂之不成人。治道不備。謂之不成國。吾今者之立國。不知治道備否。若以法治為足。則購日本六法全書一冊。夜譯而朝布之。則吾為法治國矣。若以法歐美為足。則今固政朔易服。握手免冠矣。人言共和。亦共和矣。人有國會。亦國會矣。人有政黨。亦政黨矣。人事選舉。亦選舉矣。甚且人言各州自立。民選長吏。亦實行之矣。凡歐美之至粗劣吐棄者。亦既鋪糟餽醊。甘其殘羹冷炙矣。凡吾國之先聖要道。先民遺俗。亦既掃除滌蕩矣。則吾國已治已安。太平

上理矣。而何以蒙藏喪失。各省割據。分崩離析。杭棹危顛。國勢垂亡。將為印度波蘭何哉。則治效之為得為失。果如何耶。鄙人既冥且愚。不知其由。或者教化之未宜掃絕耶。如教化可廢絕也。則禮義廉恥。四維可不張。孝弟忠信貞廉。六莖必當去。人心皆欺詐狡偽。風俗皆暴惡猾猜。若猛獸鷙鳥之相殘賊也。諸公身不可得安。家不可得有。國安可得而立哉。齊景公曰。信如父不父子不子。雖有粟吾得而食諸。諸公幸留意。天下萬國乃至野蠻。豈有無教而能為國乎。況欲立國於天壤間。與歐美競爽乎。諸公若以為教未可盡廢也。則佛教雖微妙。然多出世澶漫之言。行於蒙藏可也。若全行於中國。未能也。基督尊天愛人。養魂懺罪。施於歐美可也。若欲中國行之。其能令四萬萬人立舍祠墓之祭而從之乎。夫教必協於民俗。而後形為法律。政治乃得其宜。若不宜於民俗。而可強行乎。今吾國自有教主。宜於吾民俗。以為人心風俗之本。言奉以為法。行奉以為則。數千年中。人心風俗。政治得失。是非皆在孔教中。融鑄洽化。合之為一。若一旦棄之。則舉國四萬萬之人。徬徨無所從。行持無所措。悵悵惘惘。不知所之。若驚風駭浪。泛舟於大霧中。迷罔惶惑。不知所往也。無論孔子之道。人道也。博大高明。範圍罔外。凡食味被色。別聲而為人者。率由而不能須臾離。所謂誰能出不由戶。何莫由斯道也。即今歐美人。不能出達道達德之外也。就令如今妄人之論。以孔子為迂濶而難行。古舊而已過。欲以新道德易舊道德焉。則今青黃不接之時。新道德未成。舊道德已廢。則令舉國人民。在無教化之中矣。新道德未知經若干聖哲。乃能制作。未知經若干歲月。乃能化成。而令吾國人民。在此若干歲月中無

教焉。則隔於洪水猛獸久矣。今舉國人民皆為洪水猛獸。何以為國。則陵谷貿易。灰劫變遷。歷陽為湖。東海為田。中國為末日矣。為波蘭印度矣。諸公皆中國人也。千秋萬世。亦有子孫。其能忍此乎。其甘受此乎。夫歐美自有其美者。形而下之物質。誠不可少也。採其長可也。中國亦有其粹者。形而上之德教。誠不可廢也。補其短可也。若震歐美一日之強。則不擇而盡師之。因中國一時之弱。則不擇而盡棄其所有焉。此今學東語所斥為奴隸性之服從主人耳。未聞立國者損益折衷而可若是也。丹墨瑞典。皆皆百數十萬人國耳。等吾一大縣耳。而自為文字。自為國教。吾遊其大學。藏其國文之書。將五十萬卷。夫彼豈不知易英德之文。於交通最便。而成學最易也。何為篤守本國之文字語言。以勞費學者之精神目力哉。蓋不如是。則不能以區區之土地人民。而自立國土也。猶太亡國千九百年矣。以能篤守其教。故流離異國。而猶太至今不亡。墨西哥國未亡也。而古墨之文字圖畫。皆為班人所焚。今墨人所誦服。皆為班人之先哲遺言也。是所謂永亡也。印度雖亡。而印人篤守其教。聯絡日盛大。他日英勢稍弱。印人即可因教而自立。若吾中國一切自棄之。而師歐美。又棄其教。浸假失敗。則欲為印度。猶太不可得也。願諸公之留意也。鄙人久棄於外道。長半生。足跡遍四洲。而三周大地矣。日閱數國之報。雖朽鈍百無所知。然論閱歷。則庶老馬之識途。既與君等生同斯國。棟折榱壞。僑將壓焉。心所謂危。亦以告也。凡人心重則語長。吾敢懸國門而言之曰。徧大地百國。棄教而立國者。未之前聞。舍本師而為人奴。尤非智也。大部慕歐法美。能變舊法。若不棄芻蕘。垂採鄙言。鄙人更有以奉聞者。

三事焉。自古新舊遞嬗之間。新國之法未定。必用前王之禮樂。實萬國之通義也。英頻易姓。又嘗革命而共和矣。而紀綱道揆法守不少變。且以習俗為治。號為不成文憲法。故英尤盛強於大地也。鄙人在南洋購地於雞打。親見英人得暹之雞打也。一切皆用暹之舊。未少易也。夫雞打為巫來由王地。至野蠻也。英人尚不遽易之。若英人而盡愚也。則可。若英人而非盡愚也。則是不可不深長思也。吾今未易新國。舉數千年之道揆法守。乃至祭典盡棄之。而一切待議院之新議。天下古今所未聞也。是非革滿洲之命也。實革中國數千年周公孔子之命云爾。且以周公之才。吐哺握髮。日求七十士。而制禮作樂。猶須七年。今議院之才人。不如周公。歲月須議。不能待七年。而望革故鼎新。勝於數千年損益之法。殆無是理也。且議會開會半年。於國政大者七十五件。未能開議。何暇及於祭祀之禮。以為無關要急者乎。則最速亦必待七年後。乃克議之。是則禮壞樂崩。大教廢絕久矣。一也。且吾敬告諸公。萬國議院。只議租稅耳。進而立法耳。又進而議行政耳。若禮教民俗。非所宜及也。況於祭祀之禮乎。若議院而議及此。非徒侵官。亦且貽笑萬國矣。諸公而慕歐仿美者。其一考之查爾革命後之新憲法第八十條曰。舊例如未經議院刪除及與民主政體不相違者。一概照行。吾今應同之。無久荒先聖之祭。上帝之祀。而重為萬國笑。二也。吾又敬告諸公。凡共和之國。為人民而立。憲法煌煌。只為人民保其安甯秩序生計耳。若夫改正朔。易服色。殊徽號。異器械。改祀典。則吾國在昔帝者專制之政。非共和所能行也。況乎教宗。尤關民俗之大。英滅印度。緬甸。百數十年。猶不敢廢其婆羅門教。與回教。佛

教而取其祭田。且大地以黃金為塔廟者。只有二處。其一。則印度之霸拉憐士。其柱大數寸。瓦厚半寸。皆純黃金也。其一。則緬甸之仰光塔。高三百尺。歲必鋪金一次。凡積千年矣。其厚不知若干寸也。仰光鋪金之佛廟。吾遊尚有七焉。英人非同教者。然滅其國而敬其教。尚嚴吏卒重法律而為保守之。若吾國艷此黃金。則取之以充國餉久矣。此真文野之別也。豈不恥哉。吾遊舍衛給孤獨園佛堂。雖足山鹿苑佛堂。英人非獨不廢。且特設吏卒。撥公帑。保守其遺廟焉。佛蘭西滅突尼斯數十年。猶不敢滅其教。而取其祭田。即突厥之暴。滅布加利牙塞維。五百年。猶不敢廢其希臘教。而取其祭田。即今俄滅波蘭芬蘭百餘年。尚不敢滅其教。而取其祭田。萬國中或有暴主豪酋。敢以強權妄犯教宗者。舉國叛之。大啟兵禍。德三十年之教爭。死人千八百萬。失地於四隣無算。德分裂衰微。至今尚僅偏安。而與奧對立。為犯教怒也。公等甯不畏之乎。故大地自回教以兵力行教外。萬國未之有聞也。今中國猶是孔教也。四萬萬餘人。其從耶教佛教者。不過數百萬。從回教者。千數百萬而止矣。餘四萬萬。殆猶是孔教也。假大部與諸公。乃由外國入主中華。兵力滂大。尚不敢犯四萬萬人之國教。而收其祀田。況大部與諸公。猶是中國人乎。以各國異教。暴主豪酋。謬挾強權。妄犯宗教。猶觸舉國之怒。合而叛之。大戰三十年。大部與諸公。有幾何權力。乃能以數日之在位。而行萬國異教暴主所不敢行之事乎。幸今四萬萬國人未之知耳。又久服從於專制國下。未知歐國之例耳。又未審共和國之法耳。故大部行此巨變之政。犯全國之怒。尚能安然無事。倘如歐俗。有此巨變。則國民咸操戈而起。與政府諸

公從事。諸公數人能當數萬萬人之怒乎。故大部只能恪守數千年之舊章。無更革祀典之權。更無收孔廟祭田之權。三也。幸大部留意焉。若大部垂採鄙言。收回成命。不廢丁祭。保存祀田。猶聞絲竹。春秋之俎豆芊芊。永奉廟堂。黍稷之原田。無。則天下聞風。猶知嚮往。大教未墜。人心未死。中國猶有望也。鄙人詠仁蹈德。鼓舞軒輊。願為協律。再賡天馬之樂章。樂寫歌詩。願作中和之樂職。惟大部教之不勝惶悚屏營之至。

覆山東孔道會書

季樵先生執事。自戊戌遘難。黨禍雲興。執事與苾園尚書。子靖侍郎。並遭黨錮。北部則李杜齊首。東林則高顧並名。懷仰高山。愛而不見。流離絕海。久而未歸。加復劫灰日飛。滄桑親歷。國事危變。大教淪胥。悠悠爾心。相望不語。其為感喟。何可言耶。頃者四海橫流。六經掃地。上下竟廢。陳俎。庚子不復橫經。論語已付燒薪。黌舍鞠為茂草。國家尊器而忘道。學子媚西而棄中。或疑為無用。而諛以迂愚。或目為過去。而不周時用。甚且妄人無忌。降黜聖號。謂為政治教育哲學之名。家儒冠欲溺。世相詬病。中風狂走。大浸稽天。吁可痛矣。頃由門人梁啟超轉來賜書。承聞齊魯諸儒。大發宏願。宏茲孔道。執事靈光歸然。領袖主持。宣揚聖教。夫當世衰道微之極。運忽覩中流砥柱之擎天。乃心西悲。憂極以喜。不知手之舞之。足之蹈之也。並承立總會於曲阜。廣郡國之推行。庶幾聲教四訖。為道干城。人心不死。舊學未忘。德必有鄰。道或不墜。總會籌備。宏規大起。一一皆如祖所欲言也。惟承過許。推以所長。才質朽鈍。慚辱大命。非所承也。豈敢任也。

惟自昔者逾冠之歲。先窺百國之書。預憂洪水之來。深慮教宗之變。儒盡焚坑。撫羣經而夜泣。壁聞絲竹。念先聖而神悽。幸乃發為公羊三世之微言。証明禮運大同之奧旨。推茲大義。徧註羣經。明撥亂之外。尚有升平太平之深微。知小康之上。猶有天下為公之大道。道雖並行而不悖。泉必時出而為宜。故能曲成不遺。用以範圍無盡。不量鄙薄。負荷大教。羣經註成。陳蔡庚子。而以孔子改制考先焉。欲以孔道推四海而皆準。範千世而罔外。曾於戊戌進呈各書。並奏請開孔教之會。不幸堯臺幽囚。秦焚遂至。餘生瑣尾。絕域流亡。執禮器而西行。抱遺經而南渡。居夷浮海。訂墜守殘。海鳥煙雨。註春秋于檳榔嶼中。須彌雲霞。訂傳記于大吉嶺上。遭時禁逐。十有六年。微尚所存。居幽彌篤。躬逢嘉會。寓我素心。敢不從諸公之後。冀少効涓埃之力。庶大教之不墜。俾斯道以重光。中國不亡。黔首攸賴。亡人回首。西望神州。泰山之雲雨。彌天洙泗之波瀾。未沫曰歸曰歸。言懷吾黨。努力努力。未喪斯文。謹布區區。惟希明鑒。敬問起居。不盡悽悽。

辛亥臘遊箱根與梁起超書

一昨脂車宵邁。明月照影。僕夫戒時。中筭先發。汽車颼颼。寢臺美睡。一夕千里。旦過靜岡。遙望富士。瞻之在前。羣玉峰頭。白銀宮闕。橫雲封掩。真面邈莫。良願不遂。奈何奈何。午到國府津。遂見箱根。羣峯聳碧。松嶺夾綠。壓映海波。激瀉澗流。舊遊如昨。復集眼前。飯顆少憩。筍與遂躋。蹬道紆空。危岫挿漢。蜀坂九折。王尊所叱。棧道千盤。杜陵是吁。澗湍餘寒。空瀝冰雪。荒山竟日。但見白草。紫紆萬徑。寂寞山家。孤狃時躍。人跡俱絕。凍雲殢壑。霾霧曠谷。飛雪書霏。奇寒襲人。冷

風刺面。重裘不溫。如臨絕塞。但歎荒涼而已。登陟勞止。一步三頓。加蕭蕭暮雨。滑滑春泥。窈窕松林。冥冥列岫。僕痛馬瘡。天昏日黑。前途渺渺。客舍茫茫。叩野人而篝燈。披荆榛而覓路。道狹草長。則下臨絕壑。澗曲峰迴。則前遮峭崖。遂乃覆車折軸。兩易乘載。踟厨路左。匍匐冥行。行路之難。宛其傷矣。所幸電話先通。客館迎至。忽乃連岡列炬。走卒夾途。或挽或推。前後各四。傳呼若鳴鑾。呵殿成八騎。淒苦之餘。忽化鬧境。雲坭咫尺。天人變幻。入偃旅館。有若登仙。黃柑自青。銀魚入饌。與奴白飯。浴我溫泉。酒膩茶甘。香糜夢妥。鷄鳴夜闌。風雨如晦。追思疇曩。感慨繫之。則天之既白矣。乃策馬蘆湖。瞻望富岳。精誠開雲。積陰解駁。白頭倚霄。碧波欲冰。白帽倒影。上下摩照。光景奇絕。疑到忉利。遊時幾何。觀化無盡。湖邊得宅。板屋荒園。花石傚傚。波光泚泚。可以賃廬。便欲移家。不知桃源。此可終隱。其與吾子。將離隔矣。此地昔在南北之朝。曾設重關之險。羣雄力競。俛仰千年。今則大道荒蕪。行人斷絕。今古異跡。令人慨慷。浮雲西馳。忽晚故國。金鐵鳴飛。神州陸沈。江漢滔滔。則樓船驚波。京邑岌岌。則風塵瀕洞。成皋榮陽。復見劉項之相距。朔方西域。又聞吳越之稱王。慘淡兵戈。蕭條城野。月照白骨。是深閨夢裡之人。馬擁殘旗。慟部下招魂之祭。國殤漸無壯者。空巷只餘寡妻。嗟我遺黎。民生欲盡。一百日之倒戈。風雲慘黯。三百年之王業。宗社忽焉。每念宣室之陳。更感東市之戮。追思鼎湖之痛。自哀絕國之奔。摩黨人之碑。錮逾十載。寫湘纍之怨。行吟九歌。蕭蕭松柏。慕茂陵而不歸。莽莽河山。對新亭而下淚。江海萬里。乾坤百年。宗國瀕危。生民莫拯。及黨禁之解除。隨舊朝而同盡。俛仰身世。悲從中來自。

非木石。能無哀乎。吾三周寰宇。徧閱君相。醉諸歐之金粉。考百國之寶書。厭飫乎石室之藏。倦遊乎息陬之操。已忘歆羨。自放行藏。吾道非耶。人間何世。諸天無量。星界萬千。生有自來。游為偶現。八千往返。莫往莫來。億劫灰飛。不壞不捨。惟吾心之悲憫。忍斯世之遠離。嗟我生民。實同憂樂。欲往乎公山佛肸。尼父之行慈。五就乎夏桀殷湯。有莘之任重。無成敗利鈍之逆覩。盡瘁鞠躬。無身名得失之求全。吾固喪我。披艱掃穢。濡足匡時。光岳或完。黎民或保。仁人志士。其能忍乎。若夫處民絕之時。際國亡之厄。遠依異國。免居亂邦。道遙帷闥。播弄鉛槧。徒以箸述為暇。豫以酒博為排遣。志學行仁。生平何事。嗟乎梁生。才薄賈誼。志希伊尹。聯鑣駢靳。同拯日於虞淵。比翼齊飛。事教民於塗炭。荏苒歲暮。於今廿年。死生有命。進退維谷。豈伊異人。而有差池。夫單豹養其內。而虎食其外。拿破命冒於行。而霧助其成。凡成功者。天人各半。巧存未必得。壯往未必失。前修多矣。吾才質老鈍。道德日負。西望孺博。寶氣鬱其光華。東懷君勉。雷霆走其精銳。思草堂之萬木。未盡凋零。貌烈士之暮年。平生飛動。行軍誰與。浮海徒傷。窮冬返寒。荒山歲盡。白日西匿。長風萬里。嗟乎天命。憤悵云何。呵凍布懷。僵難覩縷。

林畏廬尺牘目錄

答某公書

答周生書

與魏季渚太守書

出都與某侍御書

上郭春榆侍郎辭特科不赴書

與國學扶輪社諸君書

與姚叔節書

示兒書

林畏廬尺牘

答某公書

伏聞大帥以精卒數千，躡敵於滬尾之礮臺坡。執事所部張李威軍五百，裸袒叱咤，直犯敵陣，敵大創而退，獲其巨酋。帥方偉公之功，而提督某害公能，至用陵詆幸卒，見直於帥，厚加賞接，毗佐營務，至慰至慰。天下勲烈所在，積忌者亦與之終始，非甚銳退容隱，實無以自善其後。執事周閱世事，當能辨之。幕府之要原，以用才為極策。顧文章之士，動多夸誕，如紆之類是爾。矧紆之所長，又未必足名為文章者。執事竟欲歲糜千金，辟為參佐，竊以執事為過聽。紆年十八，即侍先君於臺灣，童幼不自尅勉，迴念宿過，慙沮萬能，固不足以益執事也。乃欲辟致舊時無識少年，引據戎幕，無論非紆所料。即執事迴念紆童駿之狀，亦必以進紆為過舉矣。老母明年六十，近視紆益驕貴，若乳下之子，每應禮部試，如甚不得已而遣之，請留不可。行復懊悔，深念親意如此，豈忍割棄可戀之日？冒尸素之祿，以遽遠老母，執事倘為紆憐，必不忍以先君交誼之故，強致紆於幕下。且紆非自省之明，戀母之切，亦斷不忍以先君交誼之故，峻却執事。李父在臺，晤及執事，必能致紆誠款，方命之咎，死罪死罪。

答周生書

惠書獎借過力，至引王君微庵林君述庵事，推僕為古之義士，傳聞失實。此則僕所慙悚不敢遽受，必宜辨白者也。竊謂五倫中，忽有朋友之一倫，戚非兄弟，分則路人。而古人於憂危喪亡

之交。冒死捍衛。願以為過。及僕身被家難。學業不立。朝夜震局。莫省為計。則存問誘掖。摩勵砥切。均吾友之力。方悟古人置朋友於五倫中。今果大享其利也。薇庵王先生天性孝友。僕與游處二十餘年。其夫人躬被兄嫂摧殘。先生處之夷然。視兄嫂加篤。僕窺察其意。咸出至誠。因愈加推重。先生亦蓄我如季弟。學問一事。巨獎尤力。先生既死。遺其子女二人。僕私誓將獨任其婚嫁。僥倖不負死友之諾。其子元龍。依僕十年。已入邑庠。頗以詩筆驚其長老。距薇庵死之數歲。林述庵亦被疫死。於烏麓道院。僕奔哭弔之。舉族咸以幼子阿狀為託。僕亦如昔之所以處元龍者處之。亦將十年。阿狀入庠。與元龍同。其詩筆雄警。不如元龍之通峭。僕時時告以詩不足為當。求有用之學。造儒者之道。僕之所以為此者。爾時實未計其力之能至與否。即彼二君。審僕貧薄。亦未料僕之為能教養其子也。僕之為教為養。並為元龍娶婦。始天幸使然。亦二子志趣不忍忘其死父。始至於此。究皆五倫中之常事。僕習知其故。不敢自奇。而足下為僕奇之。何也。且僕尤有懼者。設彼二子驕荒敗德。與僕為難。則僕亦不過太息流涕。委諸氣數而已。此外尚有何術。推之中興勲臣。力造區夏。苟無天人合德。亦未必遽成絕大勲業。故君子任事。能歸功於天。不惟無禍。亦以養德。矧僕纖介之善。尤何足云。足下重我愛我。遂有逾量之譽。故不敢不辨。暑盛。伏唯珍衛不備。

與魏李清太守書

紆南歸計。執事當北來。四月十四日。維舟紫竹林。冀得一遇。嘯桐往省其戚羅公。云執事少駐。

旅順。自度不能更待。遂南下。而心甚念執事。所制鐵艦。北軍曾否中程。而又傷人之多言。剛者之易折。皎者之易污也。中夜浩嘆。怏怏如有所失。方今小人之多。任事之難。在古實無可比。例。蓋上有積疑之心。下多分功之思。有積疑之心。則膚寸之失。足累乎全局。有分功之思。則缺望之事。彌甚於仇讎。故凡語言酬應。精神稍不相屬。引憾已足刺骨。況又忼爽質直。自行己意。此人言之所以不直於執事。必欲求逞者也。執事此行。短執事於新帥者甚夥。紆策執事必坦然自信。然執事亦聞鄭袖之短楚美人乎。美人自多其貌。其受禍乃不在貌。而在於掩鼻。今彼人亦以掩鼻短執事者。執事安能必新帥之弗聽。王君之事。獄連裴少卿。惡王君少卿且所不惜。矧於執事有先入之言乎。為執事計。不當南歸。當於北軍擇一善地處之。勿見才。勿任氣。苟有報國之事。以誠懇雍容出之。古來志節廉介之士。至有不能成大事者。以盡人知其為志節廉介也。幹濟之士。先求韜匿。願執事留意焉。

出都與某侍御書

海隅伏聞清風。咸以敢言期許執事。比來都下。執事適糾察京畿。詢之同鄉官京朝者。又咸以執事為敢言也。屬者德人襲我膠州。及即墨。震驚聖廟。此人心至痛之事。天下洶洶。爭赴都堂言事。某等默察國家大勢。以為中國兵力。必不能及。皇上又不能置之不問。為此因事建言。請皇上下責己之詔。鼓勵士心。並陳籌餉練兵外交內治四策。歸於自強。十一日恭賁赴院。與堂期適左。乃用十六日沐浴以進。祇候栢臺竟日。以臺長未臨。令某等暫歸候諭。十九日。忽得片